



Un total de 1190 persoas (100 na actividade enfocada aos centros educativos, 330 nas conferencias do venres e 760 nas do sábado) participaron nas actividades programadas na IV edición Xornadas de Novela Negra de Verín. Desde a organización do evento cualifican este resultado como un “rotundo éxito”, ademais de ser un claro indicativo de que este evento está xa totalmente consolidado na axenda cultural da vila do Támega.

Gerardo Seoane, alcalde de Verín, salientou os «excelentes resultados de asistencia» obtidos en todas e cada unha das actividades programadas non marco destas xornadas que «sen dúbida algunha, xa son un dos máximos referentes da completa axenda cultural verinesa».

Tras agradecer o gran traballo realizado pola Biblioteca Municipal de Verín organizando estas xornadas, a concelleira de Educación, Cultura e Festexos, Emilia Somoza, quixo lembrar que para o grupo de goberno municipal a cultura foi -desde un primeiro momento- unha actividade fundamental para o desenvolvemento económico da vila. «É por iso que estamos traballando a reo na reactivación de todos e cada un dos nosos grandes eventos suspendidos pola pandemia e que, sen dúbida, devolverán á nosa cidadanía a programación cultural de primeiro nivel que tiñamos antes da emerxencia sanitaria».

Pola súa banda, desde a dirección da Biblioteca Municipal, entidade responsable organización, fan un balance «máis que positivo, xa que as cifras finais demostran un rotundo éxito de participación». Por outra banda quixeron agradecer o esforzo e apoio mostrado por todos os seus colaboradores e patrocinadores, así como o de todas os autores e expertos que

participaron nesta edición das xornadas.

IV Xornadas de Novela Negra

Baixo o título “Personaxes de novela”, o principal obxectivo deste encontro organizado pola Biblioteca Municipal de Verín foi realizar un achegamento ao público aspectos moito menos coñecidos da novela negra no que se combina o mundo de ficción e o real con personaxes verdadeiros que normalmente aparecen nas narracións deste xénero literario.

Nesta IV edición das xornadas -que estiveron coordinadas polo xuíz e escritor Xosé Antón Vázquez Taín e presentadas polos voluntarios da Biblioteca, Lorena Carnero e Daniel Carnero - contaron coa presenza de seis relatores de primeira fila dentro deste xénero (Enrique León Calviño, Víctor Souto, Iria del Río Tajés, Arantza Portabales, Alejandro Corral e Xoaquín Fernández Leiceaga) que compartiron cos asistentes a súa paixón, inquedanzas, segredos e coñecementos, convertendo a vila de Verín non epicentro cultural da novela negra.

Tamén participaron nas mesmas as voluntarias da Biblioteca, Noelia Gallego (moderando a conferencia de Alejandro Corral), Inés García (moderando a conferencia de Arantza Portabales e Fernando Serrulla) e Iria del Río, acompañada do antropólogo, Miguel Losada (moderando a conferencia de Xoaquín F. Leiceaga).

Rafael Cid, director do Centro Territorial de RTVE en Galicia, foi o responsable de dirixir unha mesa redonda na que participaron Enrique León Calviño, Víctor Souto, Iria del Río Tajés, Arantza Portabales, Alejandro Corral e Xoaquín Fernández Leiceaga.